



Gemeinsam Äntwert vun der Gesondheetsministesch a vum Minister fir d'sozial Sécherheet op d'parlamentaresch Fro n° 3404 vum Här Deputéierte Jeff Engelen a vum Här Deputéierte Fred Keup iwwert de Lipödem

1. Wéi vill Leit, Fraen a Männer, hunn zu Lëtzebuerg noweislech Lipödem?

Zu dësen zwou Froen leie weder dem Gesondheetsministère nach dem Ministère fir d'sozial Sécherheet Donnéeën vir.

2. Experte ginn dovun aus, datt 10% vun der däitscher weiblecher Bevëlkerung ënnert der Krankheet Lipödem leiden. Op wéi vill Prozent gëtt den Undeel vu betrouffene Leit hei zu Lëtzebuerg geschätzt?

cf. Äntwert op d'Fro 1.

3. Wéi vill Lipödem-Operatioune goufen an de leschten dräi Joer bei Awunner vu Lëtzebuerg duerchgefouert? A wéi eng Länner sinn des Operatioune gemaach ginn?

An de Joeren 2018-2020 goufe 9 Operatioune^{1 2} fir e Lipödem ab Stadium 3 u lëtzebuurger krankeversécherter Patienten duerchgefouert.

2019 goufen 88 Auslandsiwwerweisungen^{1 3} accordéiert, déi 71 Patienté concernéieren. Vun deenen 88 Auslandsiwwerweisungen waren 93% fir eng Operatioun an Däitschland. 2020 waren et 75 Autorisatioune¹ (respektiv 57 Patienten), dovu 87% fir an Däitschland operéiert ze ginn.

4. Ginn dës Operatioune rembourséiert an zu wat fir engem Deel? Ginn et Konditioune fir de Remboursement? Wa jo, wat fir eng? Wéi vill vun dësen Operatiounen an de leschten dräi Joer goufe vun der Krankekeess rembourséiert an zu wat fir engem Deel?

Dës Operatioune ginn ab engem Lipödem am Stadium 3 a mat engem Accord préalable vum Kontroll Dokter vun der sozialer Sécherheet (APCM) ganz vun der Krankekeess rembourséiert. En Accord fir dës Operatioun zu Lëtzebuerg maachen ze loossen, garantéiert net automatesch e Remboursement fir eng Operatioun am Ausland. Dës muss separat ugefrot an accordéiert ginn.

Déi 9 Operatioune, déi an der Fro 3 ugi sinn, goufen zu 100% rembourséiert.

¹ Donnéeën vun der CNS.

² D'Facturatioun fir 2020 ass nach net komplett vu datt Patienten 2 Joer Zäit hunn fir hir Rechnung bei d'CNS ze schécken an e Remboursement ze kréien.

³ Eng Autorisatioun fir eng Auslandsiwwerweisung bedeit net onbedéngt, dass des Operatioun och effektiv duerchgefouert gouf. Des Autorisatioune ëmfaassen net nëmmen Operatioune bei engem diagnostizéierte Lipödem, mee och aner Krankheeten wei zum Beispill en Lymphödem. Leider ass et momentan net méiglech, méi prezis Zuelen zum Lipödem ze presentéieren.



5. Zënter 2018 sollen och Operatioune vum Lipödem am Stadium 3 iwwerholl ginn. Wéi vill Demandë fir de Remboursement vun enger Operatioun vum Lipödem am Stadium 3 krut d’Krankekeess an de Joren 2019 an 2020? Wéi vill vun deenen Demandë sinn da ganz oder zum Deel rembourséiert ginn?

D’Krankekeess huet an de leschten dräi Joer (2018-2020) 18 Autorisatiounen⁴ erausginn, fir d’Käschten vun enger Operatioun vun engem Lipödem ab Stadium 3 a Lëtzebuerg ze iwwerhuelen. Dovu goufen 9 Demandë fir e Remboursement erageschéckt an déi ugefale Käschte goufen zu 100% iwwerholl.

Am Joer 2019 goufen 63 Demandë fir e Remboursement bezuelt, 2020 waren et 17 Demandë.⁵

6. Ass d’Regierung der Meenung, datt d’Iwwerhuele vun de Käschte vun der Operatioun vum Stadium 3 gutt funktionéiert?

cf. Äntwert op d’Fro 7.

7. Wat kéinte mir hei zu Lëtzebuerg nach besser maachen, fir de Leit mat Lipödem ze hëllefen?

Zënter 2018 hält d’Krankeversécherung d’Käschte fir d’Operatioun vum Lipödem ab dem Stadium 3 en charge op Basis vum Artikel 19, Alinéa 3 vum Code vun der sozialer Sécherheet dee Folgendes virgesäit:

« *Cependant dans des cas exceptionnels à constater par la Caisse nationale de santé sur base d’un certificat circonstancié du médecin traitant, l’acte ne figurant pas dans la nomenclature peut être pris en charge sur avis du Contrôle médical de la sécurité sociale (CMSS) qui fixe un tarif en assimilant cet acte à un autre acte de même importance.* »

D’Iwwerhuele vun de Käschte funktionéiert gutt, mä fir dat et nach besser funktionéiert fir déi Leit, déi vu Lipödem betraff si, gouf elo de 27. Januar 2021 an der Nomenclaturkommissioun décidéiert 2 néi Akten anzeféieren an der Nomenclature vun den Doktere fir den Traitement vum Lipödem ab Stadium 3.

⁴ Donnéeën vun der CNS.

⁵ D’Facturatioun fir 2020 ass nach net komplett vu datt et ëmmer e gewësse Retard bei dem Begläiche vun den Rechnunge mat den anere Länner gëtt punkto Remboursement vun den Traitementer.